



## QUÆSTIO MEDICA,

*QUODLIBETARIIS DISPUTATIONIBUS,  
manè discutienda in Scholis Medicorum, die Veneris  
tertiâ Junii.*

M. JACOBO DES PREZ, Doctore  
Medico, Præsîde.

*An primus activorum seu spirituum Motus ad generationem  
Cujuslibet Mixti incipit in humido?*

### I.



U<sup>RIA</sup> sunt Mixtorum summa genera: Alia in Fodinis intimisque terræ visceribus congeriem solidam aut fluidam sortiuntur; Et Fossilia audiunt. Alia suis innixa radicibus germinali eruptione ad terræ superficiem emergunt: aut absque radicibus in muscosas fibrillas abeunt: vel in Boleos, Fungos, & Tuberâ Conscrescunt; Utraque ad Germantium classem sunt reducenda. Alia demùm fecundâ utriusque sexûs Copulâ sobolescunt; Et perfectorum Animantium ordine continentur; His addenda veniunt plura Animantia quæ ex putri humore suos habent ortus. Mixta triplicis illius ordinis vel ab universalissimis primariisque Elementis sibi invicem permixtis: vel à secundariis iisque diversis propriam habent ortûs sui materiem. Ratione hujus illiuvè Elementaris mixturæ omnia Corpora sub amplissimo mixtorum genere Comprehenduntur. Quæret forsân aliquis, quænam sunt prima Elementa ex quibus

A

invicem coëuntibus quodlibet Mixtum compingitur, five fit unius & sibi ubique similis contextûs, similarisque substantiæ: five ex partibus dissimularibus, Textu Elementarique proportionem à se invicem differentibus fit coagmentatum? Tot & tanti varix extitere super eâ re Physico-Medico-rum sententiæ, ut illarum dissensionibus & dissidiis commotus & convulsus inquisitor physicæ veritatis, præsertim qui sophistarum auditor, & ab Hippocrate devius, parcusque ejus Cultor & infrequens, *Insanientis dum sapientiæ Consultus errat*, vix sciat quo duce, aut quâ dirigente luce, physicam veritatem nubibus undique obvolutam sit exploraturus. At si Hippocrati & Galeno, eorumque ratiociniis in rebus Physicis & Medicis ille præbatur assensus quo dignissimi semper visi sunt apud spectatissimos antiquioris & recentioris atatis Medicos legitima doctrinæ cultores, in promptu erit ad propositam quæstionem Responsio. Vel enim præstantissimi illi viri eorumque libri veniunt ejurandi, (Quod tamen absque perjurio non fecerit Scholæ Medicæ Parisiensis Doctor,) vel cum ipsis, imò cum Platone, Theophrasto, Aristotele pluribusque aliis omnium retrò ante ætatum Philosophis & Medicis, ea admittenda sunt Elementa quorum hypothesi omnis Hippocratica & Galenica Doctrina nititur.

## II.

**J**UXTA Hippocratem & Galenum, aliosque jam commemoratos Philosophos, primaria Mixtorum Elementa sunt ea ex quibus invicem coëuntibus cujuslibet Mixti moles constituitur, & in quæ resolvitur quicquid naturæ lege intime diruitur. Sunt numero quatuor: Terra nimirum, Aqua, Aër & Ignis: seu summè calidum, summe frigidum, summe siccum & summè humidum. Ex his cætera Elementa secundaria cuilibet Mixto propria variis & repetitis alterationibus generantur: In homine (Verbi gratia) Sanguis Pituita & utraque Bilis. Hæc sibi certa fuisse scripsit Galenus, prædictamque de Elementis Physicis hypothesim, ab Hippocrate primo illius auctore fuisse sancitam, nobis asseruit. Universalissimis hisce Elementis Communis est Materia ad patiendum apta, quæ *rudis indigestaque Moles*, nec quicquam nisi pondus iners audire debet: Hæc pro variâ informantis Elementi specie cui subternitur, plus minusvè motûs obtinet. Ne tamen dixeris Elementa à solo motu, non ab insitis igniculis, aliisve actuosis particulis suos habere agendi & alterandi modos; Hæc sunt Jocantium aut somniantium, non Philosophantium assertiones solo sensus testimonio confutandæ. Ignis essentialiter calidus dum deitrit, movetur; at motus est ustionis comes, non causâ: Aqua & Aër quò plus moventur, (citrà occlusionem, aut extrâ focarium ignem) eò magis refrigerantur; quo diutius torpent aut quiescunt, eò facilius calorem suscipiunt, à circumfusis igniculis. Minimè itaque motus est caloris causâ. Ignis & Aër cum citissimos habeant motus subjectam sibi materiem velocius movent: Aqua vero & Terra proprio pondere deturbantur, passivosque tantum motus locales experiuntur; suis tamen locis affixæ, externis & internis motibus alterantur ab actuosis particu-

lis igneis & aëreis ipsarum molem penetrantibus earundemque inertiam vellicantibus & pungentibus. Ad eundem ferè modum videre est in animantibus alimentorum partes solidas & ponderosas, spirituum ope comminui, intimè alterari, atque in tenuous substantias mutari, imò ad spirituum naturam summè actuosam vehi. Ex prædictis universalissimis Elementis variè distributis, proportionè, ut aiunt, non Arithmeticà sed Geometricà, huius illiusve spiritus arte præstantiori, hoc illudvè Mixtum oritur juxtà speciem activi à quo miscibilium Elementorum proportio in primo mixti seminio humido fuit definita & commensurata in pondère numero & mensurà. Cum enim Elementa universalissima sint ex se indifferentia ad hanc vel illam mixturæ proportionem, ad hanc vel illam mixti speciem, sanè necesse est ut ipsorum ἀδιαφορία seu inifferentia, quæ passivo modò se habet, actuosarum particularum motionè superetur, atque ad hanc vel illam mixti speciem convertatur. Concursum ejusmodi particularum in seminio humido se se expandentium, juxtà singularem illarum collectionem consideratus multis nominibus fuit insignitus. Aliis dicitur spiritus opifex: aliis Architectonicus: Stoicis continens: aliis rector: aliis genitor aliis harmonicus confluxus: Chymicis Archæus: ab Hippocrate πνεῦμα seu spiritus dicitur: aliàs ψυχὴ πνεῦς ἐ ὕδατος σύνκρυσιν ἔχουσα: à Platone Elementaris materia tenuissima signaturis à divinà exemplari causà impressis prædita: ab Aristotele ætherëus ignis Elementarem materiam intrinsece movens eique formam inducens: Ab iis qui se Mosàice Philosophiæ Professores prædicant, dicitur spiritus Domini aquas fecundans: aliàs, opifex aura in primo Mundi Exortu divinitus afflata: A Neotericis quibusdam, dicitur materia subtilis artificii motu prædita. De verbis & nominibus parùm curamus modò interim constet actuosas illas particulas artis præstantissimæ vestrices esse, materiamque, sive ab ipsis jampridem alteratam & subactam, sive deinceps alterandam & subigendam, ex quatuor prædictis Elementis, sibi invicem permixtis, esse radicitus coadunatam. Actuosæ illæ particule cujusvisque alterationis & conformationis opifices apud nos spiritus audiunt. Haud tamen sunt materiæ expertes: sed ratione divinioris auræ ipsis admixtæ, præstantiori quæ artis quam devehunt: quin & comparatæ tum ad immateriales substantias summè agiles & movere aptas, tum ad otiosas & inertes materiæ moles quæ ab ipsis exagitantur, hoc nomine fuerunt insignitæ. In Plantis & animantibus, quilibet spiritus sive sit mixti totius opifex semini primariò insidens: sive sit primarii fortis & ab ipso genitus, ignis instar dum cibus se reficit, sit novorum igniculorum genitor: at fortibus suis suum auget subiectum, ipsique dum altius insidet atque intrà illud se abscondit: aut huc illuc per Corpus se expandit, miro artificio debitam absolvit temperiem & conformationem; & eatenus ab igne focario cuncta dirigente & depopulante plurimum differt. Opificis spiritus conformatricem artem quis enarrabit? divina est, nemo videbit eam & vivet; illa, quemadmodum & ipsa Dei species, (inquit Cicero) percipitur cogitatione non sensu; ultra ne quaeris: hanc investi-

4

garunt omnium retrò ante ætatum Philosophi, abscondit se ab oculis eorum; eleganter tamen de opifice spiritu auræ diviniore participare & mixta regente, hæc scribit Virgilius:

*Ignæus est illis Vigor & Cælestis origo  
Seminibus.*

De ipsâmet aurâ divinâ hisce igniculis vitam largiente, quam bene idem cecinit, ad mentem Stoicorum quatuor Elementa admittentium:

*Deum namque ire per omnes  
Terrasque tractusque Maris Cælumque profundum,  
Hinc pecudes armenta, Viros, genus omne ferarum  
Quemque sibi tenues nascentem arcessere Vitas.*

Aura Arsque illa divina, proxima rerum omnium efficiens causa, ab Hippocrate & Galeno, sub Naturæ nomine nobis fuit expressa. Scire sufficiat præstantissimam hanc divini afflatus auram in primâ mundi Creatione à Deo spiratam, esse spiritibus admixtam & cum ipsis devehî, Vectoresque illos Spiritus sibi sublatum Seminis humorem, ex particulis elementaribus variè alteratis genitum, ad hanc, vel illam mixti speciem promovere & perducere. Hic sistitur omnis Philosophica disquisitione de activorum substantiâ Auræ Artisque diviniore participare. Universalissima vero Elementa juxta hypothesim ab Hippocrate & Galeno positam, sunt admittenda.

### I I I.

**S**ANCITO prædicto illo Elementorum quaternario: Sanctitis pariter Elementis homini propriis ex universalium mixturâ ortis, Hippocrates & Galenus ejus fidelissimus interpretes omnem suam medendi scientiam simul & artem scriptis tradidere. Præstantissimi illi medendi magistri in explicandis rebus Physicis & Pathologicis, aut in instituendâ victûs lege, medicamentis componendis, iisque assumendis, aut applicandis, nihil sollicitius curant, quam ut exuperantis Elementi primarii vel secundarii immoderationem repriment, tum in activis qualitatibus, tum in materiæ exuperantiâ calidâ vel frigidâ, humidâ vel siccâ; sanguinea, vel Pituitosâ aut Biliosâ; ab his tanquam ab evidentissimis causis, medendi indicationes nusquam non desumunt. Quis verò extrâ elementorum Hypothesim ab ipsis sancitam positus, & ab eâ remotior factus, ulla explorabit indicationum notas ab ipsâ elementis primariis aut secundariis petitas? Vaga est, incerta, erroribus perpetuè obnoxia, variis opinionum rixis factata, imò ab Empyricis & Agyrtis deridendæ medendi Sophistica disciplina quæ à Physicis principiis ab Hippocrate & Galeno admixtis prorsus recedens, in Medicâ Palæstrâ stabilem non invenit locum in quo pedem firmet. Et sanè quis, ad mentem Galeni, Empyricum Pseudo-dogmatico à veris Dogmaticis devio non antè posuerit? Paucis abhinc annis tanta fuit apud nonnullos Physiologos ab Hippocrate & Galeno dissentendi libido, ut aliquam nominis famam, eminentiorisque sapientiæ existimationem ad se convertendam sibi promiserint, si extrâ præscriptas ab his præstantissimis viris Philosophandi & medendi leges juvenili impetu, Elasticæque levitate transilirent, atque liberius huc illuc

5  
excurrerent. Hac titillante & lenocinante divagandi libidine : Hoc pruriente dissensionis orgasmo , cæcoque erga priscorum aut recentiorum errores amore , in tam dissimiles sectas distrahi fuere , ut vix duos reperiās de principiis Physicis eadem sentientes ; in se se invicem suis in tenebris pugnant. Ea est nimirum humanæ mentis mutabilitas & inconstantia , ut omnis ferè novitatis vortice Circumagatur , instabilisque rapiatur : agrè ad immotum veritatis Cubum melius instructa revocetur & retineatur. Hujusce veritatis testes & conscii sunt ii , quos Cartesiana de Elementis somnia delectant , ex omnium ferè sophistarum , præsertim vero Democriti & Epicuri commentis efficta. Ratum & fixum statuatur apud veros Hippocraticæ & Galenicæ Medicinæ cultores , prædicta quatuor Elementa universalissima , non quidem sincera , & sibi invicem per moleculas apposita ( ut placuit Empedocli & quibusdam neotericis ) sed intima alteratione subacta & permixta cujuslibet mixti molem , variâ temperie & figurâ præditam , proximè vel remotè constituere , atque insitum spiritum Physicæ mixtionis autorem sinu suo condere. Nihil nos morantur Chymici : Ipsorum enim doctrina de secundariis mixti Elementis singulari spiritus opificis artificio in intimo recessu genitis , Sale nimirum , Sulphure & Mercurio , admixta ab Hippocrate Elementa non oppugnant , sed supponunt , aut aliis hæc supponentibus relinquunt. Nos quoque ipsius sua principia & Elementa secundaria concedimus , de primorum autem numero , humidæque mixturæ agimus.

I V.

**F**OSSILIUM prima materia ex universalissimis Elementis sibi invicem permixtis procul dubio constans , est liquamen pingue humidum Ignis Aërisque subterranei energiâ de terreo & aqueo fodinæ sinu velut extractum & expressum. Metallicum ejusmodi seminium apud fodinarios Mercurius audit. Fodinis lapidariis , Metalliferis , sulphureis , Bitumineis , salinis , Aquis metallicis &c. suæ insunt actuosæ particulae : & pro diversâ specie & indole activi fodinarii , ( vulgò spiritus mineralis seminale humidum imprægnantis & regentis ) hoc vel illud Metallum , hæc vel illa Gemma , hic vel ille Lapis , hoc vel illud sulphur aut Bitumen , hic vel ille sal gignitur , hæc vel illa inest Aquis metallicis differentia : Et sic de cæteris fodinariis foetibus. Vide quam limpide splendet Adamas , rutilat Rubinus , auratur Topasium , purpurascit Saphyrus ; quam amènè viridicatus fulget Smaragdus , quam jucundè mixtis & variatis micat coloribus Opala. Cæteros gemmarum perlucidos colores contemplare : at Imprimis mirare aqueo-salinas particulas , hoc vel illo purissimo sulphure insignitas in tantam duritiem coaluisse. His adde Margaritas ex nitidissimo & ponderoso Mercuriali humido sphaericè compactas. In Metallicis ex deteriori aut foetido liquamine mercuriali concrevunt imperfecta quædam Mixta quæ vulgò *Marchasite* audiunt ; illa sunt mediæ substantiæ inter lapides & Metalla , semper noxia , aliquando autem nocentissima , quod ex impuro mercuriali humido fuerint coagulata. In Fodinis metalliferis frequenter reperitur Mercurius tum instar aquæ fluitans , tum



solâ naturæ operâ in cinnabarim conversus ; hæc de fossilibus sufficiant. GERMINANTIUM alia ex semine, alia ex Bulbis virescunt, alia ex infinis surculis, aut ramis terræ infixis fruticant. Semina sive Bulbosa sint, sive nucleis vel quovis alio tegmine obvoluta, suos non emittunt fœtus, nisi terræ inditarido humore ipsâ penetrante molliter fuerint soluta : Factâ enim cujuslibet seminis in terram demissi humidiori solutione, actuosâ seminis particulâ, priûs tegmine constrictâ, & in angustum redactâ, illo humidulo factò molliterque referato, in ampliorem molem intumescunt, sua claustra rumpunt, nutritium succum cum delectu quodam proliciunt, suosque intestinos motus alterativos peragunt. Surculis, & ramis, quos Taleas vocant ab arboribus & plantis abscissas, plurimum inest seminalis humor, qui surculis huic illivè arbori per insitum junctis, aut Taleis in terræ sinum immisiss, & utrisque externo humido ineunte verè tepefactis, in insinâ partè, ponderosâ copiâ turgens, atque exitum quarens, rimulas scindit, diductumque surculi aut Taleæ medullam in radices expandit : diductæ autem radices succum alibilem proliciunt, qui rursus Philtratione quadam à superioribus partibus proliticius surculum aut Taleam rore suo recreat, & actuosas particulas in ipsis conclusas ad suos motus instimulat ; illæ autem in motus actæ & quasi exundantes, factis hinc inde rimulis in ramos & frondes, flores & fructus abeunt. Musci, Fungi, Boleti, Tuberâ, & cætera ejusmodi ab humido putrique seminio concresecunt. DE PERFECTIS ANIMANTIBUS dicere nihil opus est. Quis enim nescit illorum generationem sive sit ab ovo, sive illo careat, seminali humido spiritibus turgido esse referendam. Hinc antiquiores Poëtæ sinxere Venerem Cupidinis matrem è spumâ Maris ortum duxisse ; quò quidem figmento nos monuere, primas ortûs nostri effêctrices causas Physicas in salaci humore contineri, ibi diviniore artè explicari & expandi, donec suis expansionibus præscriptos, suoque ævo præfinitos terminos tandem obtinuerint. Imperfecta animalia, sponte, id est citrà coitum genita, sive insecta sint sive sanguine prædita, ex putri humore suos habent ortus. Inter antiquos Philosophos Thales Milesius asseruit aquam esse rerum omnium principium, nec immeritò, modò tamen de seminali humore, & humido primigenio, cæteris Elementis unâ attemperatis permixto sit intelligendus.

## V.

RI T E à naturâ fuit institutum, ut in Quolibet mixti generandi seminio legitimus aquæ dominatus fieret, nimirum ut actuosâ & effêctrices cujuslibet Mixti particulâ igneæ, unctuosò humido delatæ ipsius rore nutrirî possent, & fecundiores fieri : quo enim præstantiori & uberiori humore primigenio illâ fruuntur, eò scilicet sibi insitos motus & alterandi modos absolvunt : puriorem & opulentiorem misturam componunt & concinnant : mixtique ævum cùm suo in longius producunt. In quovis seminio humido terra intimè permixta latitat, quæ cum aquâ, tum solidarum partium, tum (ut Chymicis placet) salis & sulphuris gignendi materia futura est ab igne insito & nitroso aère ejus individuo comite diutius coquenda, particulisque sulphureis augenda, ubi enim viget ignis

illuc necesse est appellat Aër Ignem recreans, fumosque ventilans; hinc variæ in mixtis sulphurum & oleorum differentia ab insito spiritu igneo nitrosi aëris auxilio genita ex sibi subjectâ Elementari materiâ passivâ. Insitus ille spiritus, hujus illiusve similis mixti generationi additus, triplex essentia à quibuldâ Chymicis vocatur, quod in ipso, ut aiunt, radicitus & individue contineantur tria ab ipsis laudata principia activa, Sal Sulphur & Mercurius, quæ ab actuosis mixti particulis in passivas agentibus & cum ipsis congregientibus, usque ad præfinitas insito spiritui motiones alterativas indefinenter generantur ex præjacente prædictorum quatuor Elementorum materiâ cum legitimo humoris dominio. Quæ si ita se gerunt, (quemadmodum maximè consentaneum videtur) exponendum habent atomorum motionumque Epicurearum assertores, intimarum alterationum ocores, quomodo una eademque particula (sive sit atomus, sive Indefinita tenuitatis particula subtilis) uno eodemque motu acta, eisdem elementaribus particulis se adjungens, Sal, Sulphur, & Mercurium parat & congregat, hujus vel illius indolis juxta varios Characteres quibus intimè insignitur, quasi totidem sigillis aut signaturis ipsius effigiem omnino expressuris, eandemque in toto mixti ævo pluries effecturis. Imò sive illa eadem particula fuerit in globum efficta, sive plures retinuerit angulos, quandiu mixto vitâ prædito adhærebit, tandiu sal, sulphur & Mercurium parabit, nullatenus ad id conferente hac vel illâ prædictâ particulæ figurâ. Hæc quæ vero sunt simillima, cum Epicuræ atomorum Hypothesi aut cum Elementis Cartesianis nusquam Conciliari possunt: cum Hippocraticâ autem & Galenicâ quatuor elementorum conjugatione facile sunt Concilianda. Prædicta enim quatuor Elementa simul permixta activis particulis sinu suo conclusis materiam suppeditant, Salis, Sulphuris, & Mercurii generandi, eamque in primo quovis seminio humidulam offerrunt ab eisdem particulis hac vel illâ singulari differentiâ sigillandam & consignandam.

*Ergo primus activorum seu spirituum Motus ad generationem  
cujuslibet Mixti incipit in humido.*

Domini Doctores disputaturi.

M. Ludovicus Fiquenos de  
Dragueville.

M. Claudius Bulet.

M. Alexander - Petrus Mat-  
tot.

M. Claudius Bourdelin.

M. Joannes - Franciscus Foy-  
Vaillant.

M. Alexius Litte.

M. Petrus Pourret Unici  
Fratri Regis Medicus Ord.

M. Antonius de Caen.

M. Dionysius Dodart.

Proponebat Parisiis JOSEPHUS CHAMBON, Grignianus;  
Baccalaureus Medicus. A. R. S. H. 1695.